



5

宛陵先生文集目錄卷第十

湖州後詩

剡縣臧主簿

余令之會稽新昌

傳神悅躬上人

文曜師之南徐

芝上人歸姑蘇

唐寺丞知南雄

和孫朱二公見寄

謝尉西歸

陳浩赴福州幕

示沈生

和潘叔治遊何山

張法曹歸闕

送張叔展北歸

和叔治晚見梅花

僧院枕流軒

惱儂

相逢

檣烏

過華亭

月暈

逢謝師直

迴自青龍呈師直

青龍海上觀潮

社前

水次鬪髀

葉大卿挽詞

寒食陪南園

牡丹

惜春三首

花娘歌

程山人歸飲

重過南園

送滕監簿歸寧

寄題千步院

早夏陪登疊嶂樓

得孫仲方畫美人

涂次寄羅道濟

和潘叔治六鶴圖

啄食

顧步

啖天

舞風

警露

理毛

留題潘氏假山

觀居寧畫草蟲

和穎上人南徐十詠

邵伯堰下

悼亡三首

淚

秋日舟中有感

書哀

目錄終

宛陵先生文集卷第十

臧子文剡縣主簿

剡縣無淺深歷歷能見底潛鱗莫見窺塵絃聊堪
洗古木潭上陰遺祠巖下啓應識道傍碑因風奠
醪醴

余令之會稽新昌

越舸將渡西陵時臘雪欲作陰雲垂古岸潮迴夜
冰閣冰上鯉魚紅尾鬣知君奉親聊自得窮冬涉
險仍熙熙縣民但可觀此意休羨江邊孝女碑

傳神悅躬上人

握中一寸毫寶匣百鍊金鑑貌不鑑道寫形寧寫
心古人固不識今人或所欽依然見其質儼爾恨
無音子誠丹青妙巧奪造化深妍媸必盡得幻妄
恐交侵

文曜師之南徐

班班上川羽薄暮未安巢擾擾方外士歲晏遊遠
郊正值風霜急晚冰隨處敲何時居巖下都把塵
事拋

茂芝上人歸姑蘇

身衣竺軋服手援犧氏琴繁聲不願奏古意一何

深晏景託孤艇倦飛還舊林闔閭城下寺幾里認
鍾音

唐寺丞知南雄州

前林尚含凍南國史君行逆水春風峭孤舟桂席
輕踏訶聞舊俗信鬼有頽珉當識朱衣貴壺漿擁
道迎

依韻和孫秀才朱長官見寄 二首同韻

古來富貴蹈危機樂性安貧莫謂非未及功名蒼
鬢改欲從踈懶五湖歸昔年同志逢時盡今日相
親似子稀犀僕忽辭雲海上遠持雙壁扣吾扉

謝尉西歸

曾爲洛陽客喜見洛陽人每憶舊遊處相逢借問
頻當時伊水上醉弄品花春而今絕茲樂欲語已
酸辛明朝君當去又復與誰親唯應有素月相照
寒溪濱

陳浩赴福州幕

梅殘杏將坼楊柳都未堪欲贈無所贈春風吹酒
酣遠山猶帶雪野水已如藍羽檄不應有詩書自
可耽

示沈生

稚子每多疾始與藥物親由茲沈生跡遂歷吾門
頻我居無鳥鼠乃知屋室貧舉世竟趨利爾非閭
井人

和潘叔治早春遊何山

泛寒溪流縈紆向山去淺石長蒲茸朝煙暖崑
樹捨舟當禪扉踏蘚污野屨誰愛鮑參軍登臨多
秀句

張法曹歸闕

海底日未上屋頭群雀喧晨興溪館迥坐聽櫓聲
煩出戶望行舸羨心如野猿暮春余亦去爲見故

人言

送張叔展北歸

江南春候早水暖野芹生北客欲歸日故人持贈
行莫嫌爲物薄言采幽蘭并休惜臨流醉高帆去
棹輕

依韻和叔治晚春梅花

楚人住處將爲援越使傳時合有詩常是臘前混
雪色却驚春早見瓊姿安笛吹遠曲還多怨風送清
香似可期我欲細看持在手誰能爲折向南枝

僧元復院枕流軒

寺外寒流駛開軒靜者棲淺深看藻行出沒愛鳧
鷺一悟此中趣萬緣皆可齊誰來驚節物岸木長
春美

惱儂

期我以踏青花間儻相遇果然南陌頭翩若驚鴻
度不語強躊躇羞人映芳樹兩心常自憐兩目空
相注依依不得親薄暮還愁去記取似丹葩知開
在何處

相逢

晚日南城歸橋邊見郎去遠遠逐郎迴羅衣汗微

污不惜污羅衣要與郎相顧留連芳苑中肯謝花
天嬖傍欄思晤言羞畏情誰諭草草各還家幽懷
是飛絮

檣烏

檣頭飛去烏夜夜啼聲碎猶不如水禽雙棲向煙
外煙外少分張渚間多翳會休同八九子反哺人
誰愛

過華亭

晴雲嗥鶴幾千隻隔水野梅三四株欲問陸機當
日宅而今何處不荒蕪

月暈

月暈已知風燈花先作喜明日挂帆歸春湖能幾
里

逢謝師直

昔歲南陽道中別今向華亭水上逢把酒語君悲
且喜流光冉冉去無蹤

迴自青龍呈謝師直

共君相別三四年巖巖瘦骨還依然唯髭此舊多
且黑學術久已不可肩嗟余老大無所用白髮冉
冉將侵顛文章自是與時背妻餓兒啼無一錢幸

得詩書銷白日豈顧富貴摩青天而今飲酒亦復
少未及再酌腸如煎前夕與君歡且飲飲纔數盞
我已眠雞鳴犬吠似聒耳舉頭屋室皆左旋起來
整巾不稱意挂帆直走滄海邊便欲騎鯨去萬里
列缺不借霹靂鞭氣沮心衰計欲睡夢想先到蘋
渚前與君無復更留醉醉死誰能如謫仙

青龍海上觀潮

百川倒蹙水欲立不久却迴如鼻吸老魚無守隨
上下閣向滄洲空怒泣推鱗伐肉走千艘骨節專
車無大及幾年養此膏血軀一旦翻爲漁者給無
情之水誰可憑將作尋常自輕入何時更看弄潮
兒頭戴火盆來就濕

社前

欲社先知雨將歸未見花那能長作客夜夜夢還
家

水次髑髏

不知誰氏子枯首在沙洲肉化鳥鳶腹肢殘波浪
頭曾聞南面樂寧有九原愁厚葬不爲貴漢官其
登丘

葉大卿挽詞 三首

位列名卿重年躋賜几尊臧孫宜有後定國已高
門舊族聲華遠名藩治行存秋風簫吹咽隴隧啓
雲根

自古賢才少滔滔豈足云善人安得見清譽久來
聞器隕龍文鼎竟歸馬鬣墳豐碑幾當立籍甚著
遺芬

終始爲全德生榮沒亦榮里人悲畫婁郡吏拜銘
旌石馬天麟肖松枝國棟成更看追孝意捧土作
新塋

湖州寒食陪太守南園宴

寒食二月三月交紅桃破類柳染梢陰晴不定野
雲密默默鼓聲湖岸坳使君千騎出南園歌吹前
導後鳴鐃是時輒預車馬末傾市竟觀民業拋竹
亭臨水美可愛嗑啞草木皆吐苞遊人春服靚粧
出笑踏俚歌相與嘲使君白髮體尤健自晨及暮
奏酒肴爾輩少年翻易倦倚席欠伸誰得教公雖
不責以正禮我意未容誠斗筭逡巡秉燭各分散
小人爭路何叟叟

牡丹

洛陽牡丹名品多自謂天下無能過及來江南花

亦好絳紫淺紅如舞娥竹陰水照增顏色春服貼
妥裁輕羅時結游朋去尋玩香吹酒面生紅波粉
英不忿付狂蝶白髮強插成悲歌明年更開余已
去風雨摧殘可奈何

惜春三首

九十日春無幾日不堪風雨竟吹花舞英逐水向
何處泛泛斜溪伴晚霞

前日看花心未足狂風暴雨忽無憑此身不及深
溪水隨得殘紅出武陵

春色斗空花亦休綠園深鎖更誰遊殘枝遺萼不

中看暮雨霏霏起暗愁

花娘歌

花娘十二能歌舞籍甚聲名居樂府荏苒其間十
四年朝作行雲暮行雨格夫氣俊能動人人能動
之無幾許前歲適從江國來時因讌席相微語雖
有幽情未得傳暗結殷勤度寒暑去春送客出東
城舟中接膝已心傾自茲稍稍有期約五月連航
並釣行曲堤別浦無人處始笑鴛鴦浪得名爾後
頻逢殊嫵婉各恨從來相見晚月下花前不暫離
暫離已抵銀河遠青鳥傳音日幾迴雞鳴歸去暮

還來經秋度臘無纖失愛極情專易得猜前時南
圃尋芳卉小忿不勝投袂起官私乘釁作威稜督
促倉惶去問里蕭蕭風雨滿長溪一舸翩然逐流
水忽逢小史向城來泣淚寄言心欲死願郎日日
致青雲妾已長甘在泥滓更悲恩意不得終世事
誰憑何若此郎聞茲語痛莫深天地無窮恨無已
我今爲爾偶成章便欲緘之託雙鯉

程山人歸歙州

新安固與吾鄉鄰山水清絕殊可擬我今暫來子
亦歸空聽杜鵑雲樹裏

重過南園

誰作此園爲宴喜而今樂事已難并佳人去後門
長鎖蔓草離離上古城

送滕監簿歸寧岳陽

乃翁守西鄙胡騎敢憑凌撫士無餘貨吏以文結
繩向聞來三堂今復走巴陵汧流幾千里雲夢苦
炎蒸風檣易陣馬猶使勇氣增子今遠寄省寄謝
余豈能江山可留詠燕許昔嘗曾

寄題千步院兼示譚上人

郊郭山林有美處皆爲釋子所棲託高閑不與時

俗侵寂靜豈唯魚鳥樂朝望平田插稻苗暮看西
村收雨脚

早夏陪知府學士登疊嶂樓

高陵自可眺况復更層樓
我我衆山翠活活寒溪流
新篁未掃籜緣險已脩脩
曲道出林抄飛宇跨城頭
春餘衆芳歇子結纍蔓抽
庭空野鼠竄日暝帝禽留
誰知郡府趣適有林壑幽
主人易吾土惟襲是瀛洲
伊我去問井爾來三十秋
昔望白雲下今從輕軒游

得孫仲方畫美人一軸

駿駒少馴良美女少賢
德常聞敗君駕亦以傾人
國因觀壁間畫筆妙仍奇
色持歸非奪好來者恐為
惑

涂次寄羅道濟

去年五月君到官紅蕖正開
湖水寬共酌汀洲不知暮
扣舷月露霑衣寒今年我罷
欲歸去朋酒久來無此歡
移舟不忍便爲別竟挈盃看
情未闌城闌欲閉各分散溪
雲暗澹生悲端明日抱醒風
雨急野蓮空看寄君難

和潘叔治題劉道士房畫薛稷六鶴圖

啄食

窮年見俛啄但有飢之意雖存玉山禾不入丹青
喙因思方朔嘲此豈優諧類

顧步

舉足徒有勢行沙遂無蹤迴頸誠已久未知竟何
從安能見儔侶顧望自顛顛

喚天

引吭向層霄聲聞期在耳鼓吻意豈踈知音何已
矣安得九皇同流響入萬里

舞風

如逢仙圃風飄飄奮雙翅拊節余欲助和歌誰爾
類但看矯然姿固於流雪異

警露

孤標近仙壇依約聞墜露儼如舉止揚稍見神爽
悟曉月坐清軒寒添壁間素

理毛

六鶴皆不同初生薛公筆况茲刷羽者奮迅如天
質墨客懷賞心題詩仍我率

留題毗陵潘氏宅假山

人心本好靜世事方擾擾丘壑未去時庭中結山

小長欲見蒼翠何須聽猿鳥有志同尚平當期婚
嫁了

觀居寧畫草蟲

古人畫虎鵠尚類狗與鷺今看畫羽蟲形意兩俱
足行者勢若去飛者翻若逐拒者如舉臂鳴者如
動腹躍者趨其股顧者注其目乃知造物靈未抵
毫端速毗陵多畫工圖寫空盈輻寧公實神授坐
使群輩伏草根有織意醉墨得已孰權豪不可致
節行今仍獨

和穎上人南徐十詠

鐵甕城

灑江以為池增山以為壁鐵甕喻其堅金城非所
敵前朝經喪亂曾是輕鋒鏑覽古一徜徉空聽漁
浦笛

北顧山

山勢自北來高城倚為固當時偶登臨邇者遂淪
誤微雲思作雨古樹嘗霑露今非恃險艱草木藏
狐兔

京口水

江頭潮正平日照土山口坐見遠來舟高帆忽前

後將隨入浦風稍度遙圻柳客無南北虞信是承
平久

金山寺

山與衆山殊寺非諸寺擬無面不當江有林皆照
水南冷隔吳會北渡通楊子還看上下帆日日何
常已

望海樓

嘗聞觀蹄泚詎識海水大浩浩與天同滔滔衆流
會平吞江作練遠瀉河如帶終日郡樓閒欲取長
鯨鱠

季子廟

信如季子賢自昔知能幾依約有荒祠寂寥無覓
筐壞梁生濕菌古木憑山鬼英靈豈顧茲青史辭
疊疊

鶴林寺

松竹暗山門颼颼給青吹傳聞宋高祖舊宅爲茲
寺地以黑龍升經因白馬至何必問興亡山川應
可記

夫子篆

季札墓傍碑古稱尼父篆始泐春秋義十字固莫

淺磨敲任牧童侵剝因野蘚嗟爾後之人萬言書
不顯

甘露寺

山頭百畝宮庭下千年樹在昔甘露霏嘗疑神物
護陰連殿閣寒聲撼雷霆怒瞻影衛公堂英寬想
來去

范公橋

謂公天下才非專一方惠及此作輿梁力行無鉅
細旣異國喬爲將同傳崑濟礮石亘長川寧須伐
山桂

邵伯堰下王君玉餞王仲儀赴渭州經略

席上命賦

未破河西寇朝廷尚有憂淮南命儒帥塞上足封
侯莫掾黃金甲須存百勝謀昔嘗經黠虜今去正
防秋

悼亡三首

結髮爲夫婦于今十七年相看猶不足何況是長
捐我鬢已多白此身寧久全終當與同穴未死淚
漣漣

每出身如夢逢人強意多歸來仍寂寞欲語向誰

何窳冷孤螢入宵長一鴈過世間無最苦精爽此
銷磨

從來有脩短豈敢問蒼天見盡人間婦無如美且
賢譬及患者壽何不假其年忍此連城寶沉埋向
九泉

淚

平生眼中血日夜自涓涓瀉出愁腸苦深於浸沸
泉紅顏將洗盡白髮亦根連此恨古皆有不須愚
與賢

秋日舟中有感

天乎余困甚失偶淚滂沱世事隨時遠秋風順水
多鰥魚空戀穴獨鳥未離柯歲月都無幾存亡可
奈何兒嬌從自哭婢駭不能呵已覺愁容改休將
舊鑑磨弊衣留暗垢殘藥恨沉痾斗獸驅驅役終
期老薜蘿

書哀

天旣喪我妻又復喪我子兩眼雖未枯片心將欲
死雨落入地中珠沉入海底赴海可見珠掘地可
見水唯人歸泉下萬古知已矣拊膺當問誰憔悴
鑑中鬼

宛陵先生文集卷第十

宛陵先生文集目錄卷第十一

湖州後詩

謁雙廟

和永叔晉祠詩

書謝師厚至

新冬傷逝

蘇子美竹軒

寄題涵虛閣

送李通判處州

雜興

送弟赴官江南

得李殿丞端硯

詠蘇子美千葉菊

送趙升卿之韶幕

偶書寄子美

送蕭秘校

古劍篇送蔡君謨

送逐客王勝之

送周太博之鉅野 鄴中行

大慶殿雪中 荅忠上人携古硯

讀後漢列傳 異同

蔡仲謀遺鯽魚 雜擬

荅上中人卷 送蘇子美

聞李殿丞訪別 刁景純留饌贈

寄致仕李國博 同師厚宿胥氏

聞子美登天清塔 謝師厚歸南陽

夜坐有懷 永叔贈酒

得山雨 范通判秦州

陳繹越州從事 辛著作知西京永寧

和師厚別後寄 普淨佛閣孤鶻

蜂 並遊

寄宣州真上人 元夕同賦

正月十五夜出廻 同次道遊相國寺

送惠懃上人 聞賣韭黃蓂甲

董著作為參謀 戲寄師厚生女

薛中舍宰聞喜 聯句附

希深聯句 希深據鞍聯句

同希深馬上口占 玉麈尾

風琴聯句

冬夕會飲聯句

問答

目錄終

宛陵先生文集卷第十一

謁雙廟

八月過宋都泊舟雙廟側永懷此忠良遺烈傳碑
 刻五位儼朝裾千年同血食當時多苟生貴爵曾
 誰識縱今有立墳都已荒荆棘古人非輕死於義
 實罕得英骨化埃塵令名同鳥翼飛翔出後世景
 慕無終極豈若目前榮未沒聲已息西登孝王城
 王氣由邦國

送弟禹臣赴官江南

昔與子同歸夜向瓜洲泊持杯月正清
 湍水平如

削爾來蘆岸深須防虎潛搏行行無朋友遇事自
斟酌

和永叔晉祠詩

并州古來稱近胡山雄氣壯民足儲山根晉水發
源處平若皎鑑潛決疏漸流漸急不可測以至漉
漉鳴清渠豈惟俯可見毛髮況乃了了看龜魚下
溉平田幾百頃稻苗粳粳曾不枯興亡莫問隨水
遠廟深草樹空扶踈伊君持節過其下愛此佳趣
聊停車北望故城無舊物決濟野色連立墟已向
風前聽好鳥只畏落日聞蒼狐晉人須識漢使美

冉冉青髯似綠蒲

得李殿丞端州硯

鮫龍所窟處其石美且堅蠻匠斲為硯漢官求費
錢持歸向都邑爭乞如瓦磚豈識萬里險謬竊好
事傳

書謝師厚至

爾來哭爾姑清淚滴塵几一聞在目言不謂今則
死而猶意遠行所念當至止秋風忽助嘍萬木欲
摧毀

詠蘇子美庭中千葉菊樹子

生與衆草生不與衆草榮彼皆春爭葩茲獨秋吐
英千葉共一萼百蒂共一莖幽亭聳扶踈獨本非
楮撐吾友蘇子美有酒對自傾香隨青陵蝶色映
黃金鸞昨日偶來過頗興陶令情豈敢復言詩君
家有子卿

新冬傷逝呈李殿丞

惡老今逼衰孤寂仍是悲寒風一夜起曩事無不
思手澤在故物默歷非故時夢寐猶平常反寤恨
莫追人生苦情累安得木石爲賴有同舍郎相語
強解頤

送趙升卿之韶幕

舟車歷盡險風物乃還君俎肉應多味虞韶不復
聞林鳴異音鳥山冒欲晴雲若弔張丞相空祠舊
近墳

蘇子美竹軒和王勝之

庭無十步廣有竹纔百箇子時哦其間賓友或來
和琴壺置于傍圖籍亦在左誰憐脩脩影只畏寒
日過誰憐青青枝下有暗葉墮我期霰雪時來聽
幽聲卧應當爲設榻勿使賞心剝持以報主人此
不可破

偶書寄蘇子美

君詩壯且奇君筆工復妙二者世共寶一得亦難
料我今或盈軸體逸思益峭有如秋空鷹氣馱城
雀鷁又如飲巨觥一舉不能釀既釀心已醉顛倒
視兩曜吾友叔勤正語多要嘗評吾二人放
檢不同調其友文字間苦硬與惡少雖然趣尚殊
握手幸相笑

寄題洪州李氏涵虛閣

耳熟滕閣美未爲豫章游近聞東湖上可見西山
頭朝愛雲氣生暮數鳥行幽主人趣向遠登覽日

不休父兄已三人挂冠此遲留他年儻一往風物
詠可周

送蕭秘校

比從江南來又從江南去孤舟隨鴈群晚泊定何
處霜橙可爲蠶冰鱸思下筋此興吾不知薄言聊
所慕

送李殿丞通判處州

拜官將近親不畏千里險汴流上贛水石亂波驚
颭舟人素已諳曲折就迴閃豈虞失便利倚慣憂
亦掩昔余從平流悻夢尚成魘今逢子方去青紵

絲新染沙頭有堠吏
端立板方歛鴻鴈正來翔
竟看朱服儼

古劍篇送蔡君謨自諫省出守福唐

生銅夜夜鳴判鐵未嘗缺
主人久提携何事贈離別
借問豈酬恩請看鐔上血
休歎補履功出處異施設

雜興

主人有十客共食一鼎珍
一客不得食覆鼎傷衆賓
雖云九客沮未足一客嗔
古有弑君者羊羹爲不均
莫以天下士而比首陽人

送逐客王勝之不及遂至屠兒原

犯霜出國門送客客已去
猶意行未遠策馬過寒戍
川長不見人沙没前崗路
始聞雲木深忽逢朱亥墓
金鎚一報恩義烈垂竹素
何須文學爲寄語長沙傳

送周仲章太傅之鉅野

仲月霜氣嚴朝來厚如雪
鴻鴈各南飛羽毛將恐折
征途履以足侵骨寒於鐵
得罪此爲輕君恩大懽悅

鄴中行

武帝初起銅雀臺丕又建閣延七子日日臺上群
鳥飢戔戔七子宴且喜是時閣嚴人不通雖有層
梯誰可履公幹才俊或欺事平視美人曾不起五
官褊急猶且容意使忿怒如有鬼自茲不得爲故
人輸作左校濱於死其餘數子安可存紛然射去
如流矢烏烏聲樂臺轉高各自畢逋誇彙尾而今
撫卷跡已陳唯有漳河舊流水

親郊前三日大慶殿雪中

皇帝率群臣發章聖五后冊

將郊先奉冊拜立未央庭天表君心孝人驚曉雪

零冕旒紛點綴劍佩濕晶熒曲蓋曾無用群臣敢
自寧鑪煙靜齋幄井氣凍宮鉞明日來壇下中宵
已見星

忠上人携王生古硯誇余云是定州漢祖
廟上瓦爲之因作詩以荅

硯取漢廟瓦誰恤漢廟墮重舌一如此吾今對之
悲既寶若圭璧未知爲用時

讀後漢書列傳

漢家誅黨人誰與李杜死死有范滂其母爲之
喜喜死名愈彰生榮同犬豕

異同

吾聞聖賢心不限親與疎義殊目前乖道同異代
俱堯舜及周孔千載趨一途盜跖誚孔氏弟子將
黨歟蹠自驅其衆日念殺不辜河濱捧土人海畔
逐臭夫塞川豈量力同趣即爾徒爾既不自過反
以此爲紆

蔡仲謀遺鯽魚十六尾余憶在襄城時獲
此魚留以逕歐陽永叔

昔嘗得圓鯽留待故人食今君遠贈之故人大河
北欲膾無庖人欲寄無鳥翼放之已不活烹煮費

新棘

雜擬

忽聞胡騎渡河水月鬼夜脅陰貂寒獨侍金輿立
城角龍蛇不展繞旗竿

荅中上人卷

吹笛皆學龍吹笙皆學鳳又於笙笛間高下不相
中得其精者稀得其麤者衆況於真出音千歲不
復夢爾爲學笙歟頗已臻妙弄

送蘇子美

勇爲江海行風波曾不懼但欲尋名山扁舟無定

處南有鵬若鷓臉有石若鋸毒草見人搖短狐逢
影怒不遐尚苦乖更遠饒瘴霧東土乃濱海蜃鬣
仍可怖殼物怪瑣屑羸蜺固無數鹹腥損齒牙日
月復易飶二方既若此往矣無久駐竟當西北來
醉耐多肥豸夏不馱漿酪冬不馱雉兔勿言專口
腹口腹人所務天台信竒偉石橋非坦步廬岳趣
最幽飢腸看瀑布此致雖爲高實亦難久慕君行
聽我言不聽到應悟

晚歸聞李殿丞訪別言已屢來不遇

蕭條一陋巷頻日見馬蹄歸來稚子告有客云將

睽始知君其南復歎我向西豈不懷念慕吾親書
新齋曰吾五男子愛惜無不齊所要立門戶安用
同犬雞齷齪守此客馴馴戀此棲二季留左右足
以共挈携身許遠就祿幸又奉阿婆今年還都下
路喪子與妻囊罄厭外役進退類藩羝終當改江
邑儻得致音題

刁景純將之海陵與二三子送於都門外
遂宿舟中明日留饌膾

人言汴水駛奈何已冬乾蔡雖平且慢臘月行亦
難唯聽夜冰合爲君愁苦寒暫維青絲紉邀膾白

玉盤行人反飲我於理殊未安所忻能自養不復
道加飡

寄洪州致仕李國博

湖上悠然度幾春勇拋榮祿遂天真青蒲翠竹圍
華屋白酒黃雞命里人果下有時乘小駟兒曹方
見擁朱輪田園歲入千鍾美肯似疎家苦畏貧

同謝師厚宿晉氏書齋聞鼠甚患之

燈青人已眠飢鼠稍出穴掀翻盤盂響驚鳥聒夢寐
輟唯愁几硯撲又恐架書齧癡兒効猫鳴此計誠
已拙

聞子美次道師厚登天清寺塔

二三君少壯走上浮圖巔何爲苦思我平步猶不
前苟得從而登兩股應已孿復想下時險喘汗頭
目旋不如且安坐休用窺雲煙

謝師厚歸南陽効阮步兵

一日復一朝一暮復一旦與子相經過少會不言
散我心終未極歲月忽云晏嘶馬思長道孤鳥逐
前伴駕言慕儔侶懷抱若冰炭南臨白水湄風雪
振高岸意恐慈母念疾馳節已換解劔登北堂幼
婦笑粲粲弊裘一以縫征塵一以澣而我客大梁

衣垢自悲歎

師厚明日歸南陽夜坐有懷

明朝子當去我若雲失龍龍歸雲未歸索莫將安
從半夜出戶望參畢已正中倏然變陰黑烈烈鳴
窻風窻鳴不得寐擁被一悲翁

永叔贈酒

大門多奇醞一斗市錢千貧食尚不足欲飲將何
緣豈能以口腹屈節事豪權閉戶飽於齏作詩湧
如泉一日復一夕醒日常不眠窮臘忽可怪雙壺
故人傳呼兒欲自酌瓦盞無完全其能饜甘脆而

况侑天妍却令情懷惡分與富貴偏收拾不復嘗
排置屋角邊儻官嘉客至傾倒相與顛何暇問濃
薄但覺窻扉旋誰識我為我賓主各頽然始得語
且橫既醉論益堅曾不究世務閑氣爭古先畢竟
兩未決辨吻空流涎嗟我儒者飲聒耳無管絃雖
云暫歡適終久還愁煎自甘不偶死寧募金印懸
願頻致此物勿恤蒼檐肩

得山雨

急雨射蒼壁濺林跳萬珠山根水壅壑漫竅若注
壺

范殿丞通判秦州

天水出名馬多稱黃金羈正值羌已和邊草復離
離乘肥固未失所蘊不得施主人本燕客寧獨事
書詩志尚功名間管樂猶一時去去勿復道礪落
爲男兒

陳繹越州從事

母夫人老母兄黜夫人從爾之會稽恐傷爾心不
敢泣春崗細雨聞竹雞時亦藏淚未出臉奈何相
與頭傾低誠知就祿非獲已應欲退耕無舊畦
辛著作知西京永寧

躍馬西畿今家坐在洛陽衣霑寒食雨花發故宮
墻冷淡鳩鳴屋寬閑水滿塘送君悲漸老空憶釣
伊魴

依韻和師厚別後寄

吾與爾別未及旬吾家依舊旣生塵閉門不出將
誰親自持介獨輕貨珍盤食豈有鹹酸辛苦吟輟
寢昏繼晨夜光忽怪來何頻採拾若在滄浪垠和
者彌寡唯陽春

普淨院佛閣上孤鶻

我新稅居見寺閣金碧照我破屋前目看閣上聚

鳩鴿巢棲飲哺忘窮年雕簷畫壁屎污徧以及像
塑頭與肩寺僧不敢施彈射忽有蒼鶻張毒拳鷗
鳴鵲噪鸛鶴叫怒鶻來此窺腥羶鶻心決烈不畏
衆瞥碎一腦驚後先死鳥墮空未及地返翅下取
如風旋獨當屋脊恣捨磔啄肉披肝腸弃指老鷗
無藝又狠怯盤飛欲近飢目穿逡巡鶻飽自飛去
爭殘不辨烏與鳶群兒指點路人笑我方吟憶秋
江邊

蜂

春風無主撩亂時分群養子各守脾爭掇花腹爲

臘蜜年年共割不我稽俄逢主人若過慮畏爾有
蠶成噬臍密將惡物毒爾族爾曾不得同醢雞王
雖爾名爾何補造甘爲利乃自取

並遊

並出慙羸駕康衢懶著鞭蹇蹇驢能勝馬擘道去如
煙何用嗟遲疾從來有後先所期皆一至我到爾
應還

寄宣州可真上人

昭亭山色無纖塵昭亭潭水見游鱗長松碧篠入
古寺石上高僧度幾春

元夕同次道中道平叔如晦賦詩得閑字
金輿在閭闔簫吹滿人寰九陌行如畫千門夜不
關星通河漢上珠亂里問問誰與聯輕騎宵長月
正閑

正月十五夜出廻

不出只愁感出遊將自寬貴賤依儔匹心復殊不
歡漸老情易厭欲之意先闌却還見兒女不語鼻
辛酸去年與母出學母施朱丹今母歸下泉垢面
衣少完念爾各尚幼藏淚不忍看推燈尚壁卧肺
腑百憂攢

同次道游相國寺買得翠玉嬰一枚

古寺老栢下叟貨翠玉嬰獸足面以立瓜腹肩而
平虛能一勺容色與藍水并我獨何爲者忽見目
以驚家無半鍾畜不吝百金輕都人莫識寶白日
雙眼盲

送惠勳上人

遽告我行何所之東南爾土爾自知山水佛事不
暇說去何速兮來何爲公卿貴人見爾喜爲爾買
屋丐爾資王城幸可樂歲月野鶴終是思陂池去
去雲霞不容侶却應來此如前時

聞賣韭黃蓼甲

百物凍未活初逢賣菜人乃知糞土暖能發萌芽
春柔美已先薦陽和非不均芥根守天性憔悴澗
之濱

董著作嘗為參謀歸話西事

子說頗驍勇築城收漢疆提兵無百騎偷路執生
羌大將罪專輒舉軍皆感傷歸來出萬死羸馬亦
摧藏

戲寄師厚生女

生男衆所喜生女衆所醜生男走四鄰生女各張

口男大守詩書女大逐雞狗何時某氏即堂上拜
媪叟

薛中舍宰聞喜

秦人宦于秦百事順耳目山川我已踈風物予所
熟維美行邁時親賓祖車轂空將離別心欲出無
僮僕

聯句附

古木含清吹池上增晚涼余懷本達曠謝少聯此
傲羲皇孤鷗可與狎絳幽岸足以觴幸有彭澤酒
堯臣便同求嘉堂潘生起為壽維王子齊陳章林端

見新月 行草際聞寒 蟄照水 螢影亂 良臣拂筵 蓼
花香徘徊 戀嘉境 坐使歸興忘 少卿

希深洛中冬夕道話有懷善慧大士因探
得江字韻聯句

彼有上人者 妙談心所降 希深達空知 不二觀行
本無雙 聖俞久阻飄花席 因思響雪窓 希深社中
雖得遠方外 自非龐聖俞 夢幻慙他劫 風塵厭此
邦 希深終期親道樹 何必憶重江 聖俞

希深本約遊西溪 信馬不覺行過據鞍聯
句

有意訪西溪 順途吟思迷 及茲詢野老 已恨過芳
蹊 希深醉客但多興 幽禽空自啼 無由駐金勒 林
表日光低 堯臣

同希深馬上口占送九舅入京城親聯句
之子洛中來 芳罇喜暫開 人誇阿連少 吾愧士衡
才 希深 丹闕鳳皇去 清川鴻雁迴 都門春色美 相
送思悠哉 堯臣

玉麈尾寄傅尉越石聯句

齋中獨何物 持之想見君 惟茲玉麈尾 信美而有
文 夫子善談道 亶亶詞如雲 在握昔同色 傾坐今

離群絳况託懷袖好曾親蕙蘭葉常許助閑放於
焉探典墳既乃阻清燕復屈驅虫蚊自殊白團扇
未畏秋葉紛堯臣

風瑟聯句

竅竹漏天風張絃擬嶧桐佳名從此得妙響未曾
窮希深夜靜危臺上人閑皎月中依依聽不足秋
露滿蘭叢聖俞

冬夕會飲聯句

與君數夜飲唯恐酒盞空今我苦欲淺堯臣語志
難此同陳編侑歡適謝景初間謔何魁雄婢子寒

且倦堯臣主人哦不窮燈青屢結花景初煎響時
鳴蟲穴鼠暗出沒堯臣風鴈高雍容冰霜覆瓦屋
景初貂狐輸貴翁孤床乏暖質堯臣苦語有淡工
咀嚼患各小景初煨炮驚殼紅落蟾斜入竅堯臣
遠漏微逝風醉心欺睡鬼景初細書刺昏瞳吽呀
聞爭犬哮吼獸啼驢撥大亂頰豆附炙雙鬢弓乾
果硬迸齒堯臣寒壘酸滿胃枯蛤擘無肉淡脯燒
可饗語必造聖賢樂已過鼓鍾紙窻幸未曙景初
絮被令旋縫凍痺兩股鐵跑孤雙鬢蓬脰承既懶
溺棍虱唯欲烘器皿足缺齧齒捧執無天穠兒女寒

不寢堯臣僮僕困欲瞢豈無貴富徒笑此飢寒蹤
丈夫固有負道義久已充墨子不黔突齒輩且得
封勉哉梅夫子塞者終自通景初

問答送九舅席上作

金鑿落問深留贈行人須滿酌銀餅况有宜城醪
及取春風花照灼

小屏風問希座隔流塵素影融方床六尺偃清晝
慙無玉枕名通中

玉蟾蜍問深厠君筆硯誠有諸可愛亭亭寒月照
瑩然四座凝冰壺

金錯刀問希連環交刃吹風毛美人贈我萬錢貴
何必翦犀誇孟勞

青雲梯問希尺木為階行勿迷勤脩道業生羽翼
天門九龍襲須攀躋

鳳于飛問深差差粹羽今逢時桐花正羨商雪亂
家庭玉樹須來儀

宛陵先生文集卷第十一

